



SLUŽBENE NOVINE

KANTONA SARAJEVO

Godina XXIV – Broj 34

Četvrtak, 29. augusta 2019. godine
SARAJEVO

ISSN 1512-7052

KANTON SARAJEVO

Vlada Kantona Sarajevo

Na osnovu čl. 26. i 28. stav 1. Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), člana 252. stav (3) Zakona o privrednim društvima ("Službene novine Federacije BiH", broj 81/15) i člana 11. alineja 5. Zakona o privrednim komorama u Federaciji Bosne i Hercegovine ("Službene novine Federacije BiH", broj 35/98 i 34/03), i čl. 9. stav (2) tačka f) i 10. Zakona o obrazovanju odraslih ("Službene novine Kantona Sarajevo", broj 40/15), Vlada Kantona Sarajevo, na 34. sjednici održanoj 22.08.2019. godine, donijela je

UREDBU

O USAVRŠAVANJU PREDSEDNIKA I ČLANOVA NADZORNIH ODBORA I UPRAVA PRIVREDNIH DRUŠTAVA SA UČEŠĆEM DRŽAVNOG KAPITALA IZ NADLEŽNOSTI KANTONA SARAJEVO

I - OSNOVNE ODREDBE

Član 1.

(Predmet)

Ovom uredbom uređuju se uslovi, način i program usavršavanja predsjednika i članova nadzornih odbora i uprava privrednih društava sa učešćem državnog kapitala iz nadležnosti Kantona Sarajevo (u daljnjem tekstu: usavršavanje).

Član 2.

(Usavršavanje)

- (1) Usavršavanje organizuje Privredna komora Kantona Sarajevo uz saglasnost Vlade Kantona Sarajevo (u daljem tekstu: Vlada) i uz angažovanje univerzitetskih profesora, privrednika i državnih službenika organa državne službe Kantona Sarajevo koji imaju odgovarajuće radno iskustvo ili su se istakli naučnim ili stručnim radom iz oblasti obuhvaćenih usavršavanjem.
- (2) Usavršavanje se provodi po Programu usavršavanja predsjednika i članova nadzornih odbora i uprava privrednih društava sa učešćem državnog kapitala, kojeg donosi Privredna komora Kantona Sarajevo (u daljem tekstu: Privredna komora) u skladu sa Zakonom o obrazovanju odraslih ("Službene novine Kantona Sarajevo", broj 40/15), i uz pribavljenu prethodnu saglasnost Vlade.

II - USLOVI, NAČIN I PROGRAM USAVRŠAVANJA

Član 3.

(Obaveza usavršavanja)

- (1) Usavršavanje moraju proći predsjednici i članovi nadzornih odbora i uprava privrednih društava sa većinskim učešćem državnog kapitala iz nadležnosti Kantona Sarajevo i predsjednici i članovi nadzornih odbora privrednih društava u kojim učešće državnog kapitala nije većinsko, a koji su u nadzorni odbor kandidovani ispred državnog kapitala, u roku od jedne (1) godine od dana imenovanja na poziciju.
- (2) Lica koja posjeduju certifikat izdat od ovlaštenog organa bilo kojeg nivoa vlasti u Bosni i Hercegovini, izuzeti su od obaveze usavršavanja iz stava (1) ovog člana.
- (3) Usavršavanju može pristupiti i svako drugo lice koje ispunjava uslove iz člana 248. Zakona o privrednim društvima ("Službene novine Federacije BiH", broj 81/15).

Član 4.

(Obuhvat usavršavanja)

- (1) Usavršavanje obuhvata slijedeće oblasti:
 - a) osnove građanskog prava i privrednog prava;
 - b) osnove računovodstva;
 - c) osnove poslovnih i javnih finansija;
 - d) osnove reinžinjeriniga privrednih društava;
 - e) osnove korporativnog upravljanja;
 - f) i druge oblasti neophodne za upravljanje privrednim društvima.
- (2) Usavršavanje obuhvata i posebne zakone iz određenih oblasti privredne djelatnosti, propise iz oblasti poslovanja i registracije privrednih subjekata, obligaciono pravnih odnosa i privredno pravnih ugovora, kao i kantonalne propise koji sa kojima bi trebali biti upoznati predsjednika i članova nadzornih odbora i uprava privrednih društava sa učešćem državnog kapitala.
- (3) Detaljan sadržaj obuke, teme, satnicu sačinit će Privredna komora zajedno sa predavačima, a koju odobrava Vlada.
- (4) Prijedlog Programa usavršavanja sačiniti će Privredna komora u roku od 30 dana od dana objavljivanja ove uredbe u "Službenim novinama Kantona Sarajevo".
- (5) Program iz stava (4) ovog člana, objavit će u "Službenim novinama Kantona Sarajevo".
- (6) Rukovodeći se principima cjeloživotnog učenja, predsjednici i članovi nadzornih odbora i uprava privrednih društava sa učešćem državnog kapitala, dužni su nakon sticanja certifikata, jednom godišnje pohađati edukaciju/seminar/radionicu u trajanju od osam (8) sati iz gore navedenih oblasti, u organizaciji Privredne komore.

Član 5.

(Program usavršavanja)

- (1) Program usavršavanja će sadržavati:
 - a) Program obrazovanja,
 - b) Dokazi o kompetencijama stručnih lica koji će realizirati program obrazovanja,
 - c) Dokaz o obezbijedenosti adekvatnog prostora, opreme i nastavnih sredstava.
- (2) Usavršavanje se vrši prema odobrenom programu usavršavanja koji sačinjava Privredna komora i sastoji se od edukativnog dijela koji uključuje predavanja i interakciju polaznika, pripreme za polaganje završnog ispita i zatim završnu provjeru stečenog znanja.
- (3) Javni poziv za edukaciju usavršavanja predsjednika i članova nadzornih odbora i uprava privrednih društava sa učešćem državnog kapitala, Privredna komora je dužna raspisati i objaviti u dnevnim novinama koje se distribuiraju na cijeloj teritoriji Bosne i Hercegovine i na službenoj web stranici Privredne komore, minimalno jednom godišnje, a po potrebi i češće.
- (4) Privredna komora će svim polaznicima nakon završenog edukativnog dijela izdati potvrde o uspješno završenoj edukaciji.
- (5) Poslije uspješno završene edukacije polaznici mogu pristupiti i polaganju završnog ispita.
- (6) Certifikat o uspješno položenom završnom ispitu, potpisuje i izdaje ovlašteno lice Privredne komore Kantona Sarajevo koji je ovjeren otiskom pečata.
- (7) Nakon objave Programa iz stava (4) ovog člana, Komora će isti objaviti i na zvaničnoj internet stranici, s ciljem informisanja javnosti.

Član 6.

(Završni ispit)

- (1) Predsjednik Privredne komore Kantona Sarajevo imenuje komisiju za provođenje završnog ispita.
- (2) Komisija će brojati tri člana iz reda predstavnika Privredne komore Kantona Sarajevo, predavača uključenih u proces edukacije i predstavnika Vlade.
- (3) Završni pismeni ispit sprovodi Komisija u prostorijama Privredne komore, koja prati i priprema sam tok ispita.

Član 7.

(Prijava)

- (1) Privredna komora raspisuje Javni poziv za edukaciju usavršavanja predsjednika i članova nadzornih odbora i uprava privrednih društava sa učešćem državnog kapitala u nadležnosti Kantona Sarajevo.
- (2) Prijava za usavršavanje podnosi se Privrednoj komori.
- (3) Prijava mora sadržavati podatke o kandidatu i dokaz o stručnoj spremi i radnom iskustvu.
- (4) Nakon prijema prijave, Privredna komora podnosiocu prijave koji ispunjava uslove za usavršavanje iz člana 3. ove uredbe, upućuje obavještenje koje obavezno sadrži:
 - a) mjesto usavršavanja;
 - b) termin usavršavanja,
 - c) visinu naknade za usavršavanje.

Član 8.

(Mjesto usavršavanja)

- (1) Usavršavanje se vrši u sjedištu Privredne komore Kantona Sarajevo.
- (2) Izuzetno, usavršavanje se može organizovati i izvan sjedišta iz stava (1) ovog člana.

Član 9.

(Visina naknade)

- (1) Visinu naknade na godišnjem nivou, za usavršavanje utvrđuje odlukom predsjednik Privredne komore Kantona Sarajevo uz informisanje Vlade.

- (2) Naknada iz stava (1) ovog člana ne može biti veća od naknade utvrđene na federalnom nivou.

Član 10.

(Nadzor)

- (1) Privredna komora vodi evidenciju o izdatim certifikatima kao i o provedenoj kontinuiranoj edukaciji polaznika usavršavanja.
- (2) Nadzor nad provođenjem ove uredbe i drugih pravila propisanih od strane Privredne komore vrši Ministarstvo pravde i uprave Kantona Sarajevo.

III - PRIJELAZNE I ZAVRŠNE ODREDBE

Član 11.

(Zatečeni predsjednici i članovi nadzornih odbora i uprava privrednih društava)

- (1) Predsjednici i članovi nadzornih odbora i uprava privrednih društava sa većinskim učešćem državnog kapitala, čiji mandat je u toku, i lica koja su kandidati za izbor i imenovanje za predsjednike i članove nadzornih odbora i uprava privrednih društava sa učešćem državnog kapitala, u postupcima koji nisu okončani do dana stupanja na snagu ove uredbe, dužna su završiti usavršavanje u roku od šest mjeseci godinu dana od dana stupanja na snagu ove uredbe.
- (2) Usavršavanje iz stava (1) ovog člana vrši se na način i u postupku utvrđenom ovom uredbom.

Član 12.

(Stupanje na snagu)

Ova Uredba stupa na snagu narednog dana od dana objavljivanja u "Službenim novinama Kantona Sarajevo".

Broj 02-05-31141-5/19
22. augusta 2019. godine
Sarajevo

Premijer
Edin Forto

